



O Vao ma Upu Leaga



Saunia e Julie Cornelius-Huang
(E faavae i se tala moni)

“E mafai ona ta talanoa?” Sa fesili atu ai Jonas ia Tina. Sa ia nofo i lalo i luga o le mutia i talaane o le mea sa ia veleina ai le vao o le togalaau.

“Ua lelei. O le a le mea o tupu?” O le fesili lea a Tina. Sa ia aveeseina ona totigilima faitogalaau palapala.

“O ananei i le aoga sa fai ai e nisi tamaiti se upu ou te lei iloaia. Sa latou talie ina ua latou fai mai ai,” o le tala lea a Jonas. “Ou te manatu o se upu leaga.”

“O le a sou lagona ina ua e faalogo i le upu?” na fesili atu ai Tina.

“Ou te lei maua ai ni lagona lelei.”

Sa musumusu atu e Jonas le upu ia Tina. Sa ia ta’u atu ia te ia le uiga. Na sa’o lava Jonas. E le o se upu lelei.

“Ae aisea e leaga ai?” sa ia fesili ai.

“E leaga aua e agaleaga ma e le faalolalo. A tatou faaaogaina upu faapena, e faigata ai mo le Agaga Paia ona faatasi ma i tatou. Sa ta’u atu e le Agaga Paia ia te oe e leaga. O le mafuaaga lena e te le’i maua ai se lagona lelei i totonu.”

Sa faauu Jonas. “Ae o isi tamaiti sa foliga mai sa fiafia. Aisea ua na o a’u ai na lagona le le toafimalie?”

“E faapefea ona e iloa e lei mauaina e isi tamaiti na lagona?” O le fesili lea a Tina.

“Ona sa latou talie uma ma ataata ina ua fai mai e se tasi le upu.” Sa lagona e Jonas le le mautonu.

“O nisi taimi e talie pe ataata tagata pe a latou lagona le le toafimalie,” o le tala lea a Tina. “Ma o nisi taimi pe a latou faalogo pe fai soo atu ni upu leaga, e le toe faalavelave ia i latou. Ae e le sa’o lava le fai atu o na upu. E pei lava o nei vao. O lea ou te veleina ina ia mama ai le togalaau ma ia ola ai laau lelei.”

“Ua ou fiafia ou te le’i faia le upu,” o le tala lea a Jonas.

“E faapena foi a’u,” na fai atu ai Tina. “Ua ou mita-mita lava ia oe. Ma, e i ai so’u manatu. Aisea tatou te le faia ai se folafolaga faaleaiga?”

“O le a le ituaiga?” Sa fesili atu ai Jonas.

“Sei o tatou folafola e faaoga upu lelei ae le o upu leaga. E mafai ona avea o se feagaiga faaleaiga.”

Sa fiafia Jonas i lena manatu. Sa faatalofa o ia ma Tina. Sa lagona e Jonas se lagona lelei e uiga i le folafolaga na ia faia ma Tina.

“Ia, ae a pe a e folafola mai e fesoasoani ia te a’u e faauma le veleina o le vao?” O le fesili lea a Tina. “Ona ou folafola atu lea e ave oe i le paka.”

Sa ataata Jonas ma piki i luga le suo. “O se tonu lelei lena.”

A o ia fesoasoani atu ia Tina, sa lagona e Jonas se lagona sili atu ona lelei. Sa ia iloa o le folafola atu e le faaaogaina upu leaga o se filifiliga lelei lea mo lo latou aiga. ●

O lenei tala sa tupu i le ISA.

“Aisea tatou te le faia ai se folafolaga faaleaiga?” O le fesili lea a Tina.